

Artikel ini merupakan siri ketiga daripada empat artikel bersiri mengenai persaingan, yang dibawakan oleh Suruhanjaya Persaingan Brunei Darussalam, sebuah badan separa kehakiman yang dimandatkan untuk menggalakkan dan mengekalkan persaingan yang adil di dalam landskap ekonomi Negara Brunei Darussalam, melalui penguatkuasaan Akta Persaingan. Untuk maklumat lanjut, sila layari www.ccbd.gov.bn atau hubungi melalui exec.secretariat@ccbd.gov.bn (E-mel) atau +673 2383100 (Telefon).

Memperkasakan Persaingan Adil: Mengesan dan Mencegah Perjanjian Anti-Persaingan

Persaingan yang adil adalah asas kepada pasaran yang dinamik, mendorong inovasi, kecekapan, dan memberi pilihan kepada pengguna. Namun, integriti persaingan ini boleh terjejas apabila sesebuah perniagaan terlibat dalam perjanjian anti-persaingan, iaitu amalan yang merosakkan prinsip keadilan. Perjanjian-perjanjian ini, yang sering kali berupa persetujuan rahsia antara pesaing, boleh muncul dalam pelbagai bentuk, seperti penetapan harga, kawalan bekalan, pembahagian pasaran, dan penipuan bidaan.

- **Penetapan Harga:** Pihak-pihak yang bersaing bersetuju untuk menetapkan harga pada tahap tertentu, sekali gus menghapuskan persaingan dan secara artifisial meningkatkan harga bagi pengguna.
- **Kawalan Bekalan:** Perjanjian antara pihak-pihak yang bersaing untuk menghadkan pengeluaran atau bekalan barangan dan perkhidmatan. Tindakan ini mencipta kekurangan buatan dan mendorong kenaikan harga.
- **Perkongasian Pasaran:** Perjanjian yang membahagikan kawasan atau pelanggan di antara pihak-pihak yang bersaing, yang seterusnya menyekat persaingan dan menafikan pengguna daripada mendapatkan pilihan yang lebih baik.
- **Penipuan Bidaan:** Pakatan sulit antara pihak-pihak yang bersaing untuk memanipulasi proses bidaan, dengan tujuan memastikan hasil yang telah ditentukan dan menafikan pengguna daripada manfaat harga yang kompetitif.



Perjanjian-perjanjian ini mengakibatkan harga yang melambung, kualiti yang menurun, dan akses pasaran yang terhad, seterusnya menghakis manfaat persaingan. Menyedari kesan negatif yang ditimbulkan oleh perjanjian anti-persaingan, Suruhanjaya Persaingan Brunei Darussalam terus berwaspada dalam usaha mereka untuk mengesan dan mencegah tingkah laku anti-persaingan ini.

Contoh-contoh dari negara jiran seperti Singapura dan Malaysia menekankan kepentingan kewaspadaan dalam mengatasi perjanjian anti-persaingan. Salah satu kes yang signifikan di Singapura melibatkan Suruhanjaya Persaingan dan Pengguna Singapura (CCCS) yang menyiasat sebuah kartel dalam sektor pengedaran ayam segar. Siasatan itu mendedahkan bahawa beberapa pembekal telah terlibat dalam perjanjian penetapan harga, memanipulasi harga, dan membahagikan pelanggan di antara mereka. Akibatnya, pengguna terpaksa menghadapi harga yang melambung secara artifisial untuk produk ayam. Dengan penelitian yang teliti dan kerjasama dengan pihak berkepentingan dalam industri, CCCS berjaya membongkar kartel tersebut, mengenakan penalti kewangan dan mengambil langkah-langkah pencegahan bagi menegakkan persaingan yang adil dalam pasaran.

Begitu juga, Suruhanjaya Persaingan Malaysia (MyCC) telah mengambil langkah proaktif dalam menangani perjanjian anti-persaingan di pelbagai industri. Dalam satu kes yang signifikan, MyCC membongkar kartel di kalangan pengendali bas yang berkomplot untuk menetapkan harga dan berkongsi laluan, yang sekaligus menghadkan persaingan dan mengeksploitasi pengguna. Melalui siasatan yang teliti dan tindakan penguatkuasaan yang tegas, MyCC mengenakan denda dan melaksanakan program pematuhan untuk mencegah kejadian berulang. Dengan itu, MyCC menghantar mesej yang jelas bahawa tingkah laku anti-persaingan tidak akan diterima dalam pasaran Malaysia.



Untuk mengatasi perjanjian anti-persaingan dengan lebih berkesan, pihak CCBD menggunakan pelbagai kaedah pengesanan, seperti rejim kelonggaran, atau *leniency regime*. Di bawah Akta Persaingan, rejim ini membenarkan pengurangan penalti sehingga maksimum 100% yang boleh diberikan berdasarkan kes tertentu, kepada mana-mana perusahaan yang telah:

- a) Mengakui penglibatannya dalam pelanggaran mana-mana larangan-larangan di bawah Bab 11 (Perjanjian Anti-Persaingan);
- b) Memberikan maklumat atau bentuk kerjasama lain kepada CCBD yang secara signifikan membantu, atau mungkin akan membantu, dalam mengenalpasti atau menyiasat pelanggaran oleh perusahaan lain.

Sebagai kesimpulan, usaha untuk menentang perjanjian anti-persaingan adalah sangat penting bagi mengekalkan persaingan yang adil dan melindungi kebajikan pengguna di Brunei Darussalam. Dengan penguatkuasaan yang tegas dan langkah-langkah pencegahan yang berkesan, CCBD bertekad untuk memastikan prinsip permainan yang adil terus ditegakkan dalam pasaran. Siri seterusnya akan membincangkan Bab 21 (Penyalahgunaan Kedudukan Dominan) dan Bab 23 (Penggabungan Anti-Persaingan), yang dijadualkan untuk dikuatkuasakan pada sekitar tahun 2025.